

ՉԱՐՉԱՐԱՆՔՆԵՐՈՒ ՄԵՁ ՀԱԻԱՏՔԻ ԶՕՐՈՒԹԻՒՆ ԵՒ ՀԱՄԲԵՐՈՒԹԻՒՆ ԽՆԴԻՆԸ  
ԱՂՕԹՔ

Շնորհակալութի՛ւն քեզի, Տէ՛ր, որ զիս՝ անարժանս արժանի ըրիր քու պարգևիդ: Դուն՝ որ մարդուն մեղանշումէն ետքն ալ չլքեցիր զայն երբեք, այլ մեր տկարութիւնները դարմանելու համար՝ քու աստուածային գթութեամբդ երկիր դրկեցիր քու սուրբ մարգարէներդ եւ սիրելիներդ, որոնք աշխարհի եւ հեթանոս ազգերու խաւարին մէջ լուսատուներ եղան, թէպէտեւ անմիտ ու անօրէն մարդոց կողմէ հալածուեցան: Իսկ որոշուած ատենին աշխարհ դրկեցիր քու Միածին Որդիդ, Լոյսը՝ Լոյսէդ, Կեանքը՝ Կեանքէդ. եւ անիկա Սուրբ Կոյսէն մարմին եւ մեր նմանութիւնը առաւ իր վրայ, որպէսզի այդ նմանութեամբ մեզ վերըստին իր աստուածութեան մօտեցնէ, ինք՝ որ մեզի պէս եղաւ: Կոյսէն ծնաւ մարմնով եւ մարդացաւ, մեզի պէս մարդ եղաւ, մնալով իր աստուածային փարփին մէջ. իր աստուածութեան մէջ փոփոխութիւն չմտաւ, այլ նոյնն է՝ ինչպէս որ էր եւ է եւ յաւիտեան կը մնայ Հօրը եւ Սուրբ Հոգիին հետ միասին: Բայց մարդիկը սիրելուն համար՝ մեզի պէս եղաւ, որպէսզի իր փրկութեան աստուածային գերազանց շնորհքին մասնակից դարձնէ մեզ, իր Հօրը կամքին համաձայն. եւ կատարեց Հօրը կամքը, եկաւ եւ իր արիւնով մեզ գնեց մեղքերու ստրկական ծառայութենէն. որով մենք քու Որդիիդ արեան գինն ենք, անոր մարմնով եւ արիւնով ազատուած ու փրկուած:

Որդի՛ Աստուծոյ, այս նեղութեան ցաւերուն մէջ տոկալու զօրութիւն տուր եւ ողորմէ՛ ինձի, ինչպէս ողորմեցար խաչելութեան ատեն քեզի խաչակից աւազակին: Շնո՛րիք տուր ինձի՝ որ համբերեմ այս դառն տանջանքներուն, որպէսզի ե՛ս ալ արժանի ըլլամ պահելու մեր լուսաւոր հաւատքին աւանդութիւնը, որ ինձի տուիր՝ որպէսզի ճանչնամ եւ կատարեմ քու կամքդ:

Արդ, Տէ՛ր բարերար, դուն որ ըսիր՝ «Ես միշտ ձեզի հետ պիտի ըլլամ, մինչեւ աշխարհի վախճանը», մի՛ լքեր զիս, այլ զօրացո՛ւր քու կամքիդ մէջ, որպէսզի կարենանք այս պատերազմին տոկալ քու մեծ անունիդ համար. որպէսզի հաւատքի մեր պարծանքը յայտնուի քու ծառաներուդ եւ քե՛զ ճանչնան իբրեւ Տէր եւ Աստուած:

Դուն, մարդասէ՛ր, քու արդարներուդ խումբին խառնէ մեզ եւ զօրութիւն տուր՝ որ պատերազմինք եւ ի հարկին մեռնինք քու ճշմարտութեանդ եւ անունիդ համար, եւ դարձեալ փառքով նորոգուինք՝ երբ վերստին առաքես իւրաքանչիւրին հատուցումներուն բաշխիչը՝ մեր Տէր Յիսուս Քրիստոսը. որպէսզի զուարթ երեսով կանգնինք անոր դիմաց եւ յաղթանակի պսակը առնենք քեզ սիրողներուն հետ միասին:

Ամենակալ Տէր, դուն որ փառքով կը պսակես քեզի յուսացողները եւ կը կատարես քեզմէ վախցողներուն փափաքը, զիս արժանի ըրէ, Տէ՛ր, որ քու վրայ իմ յոյսս պահեմ, եւ համբերութիւն տուր որ իմ ընթացքս կատարեմ այս նեղութեամբ, որուն մէջ կը գտնուիմ:

Դուն՝ որ մեր ցաւերը կը բժշկես, սրտաբեկները կ'առողջացնես, նեղեալները կը հանդարտեցնես, կապուածները կ'արձակես, սգաւորները կը մխիթարես, անյոյսներուն յոյս կու տաս, խռովածներուն՝ հանգիստ, եւ յոգնածները նաւահանգիստ կը հասցնես, դուն՝ որ սիրով կը նայիս քու արարածներուդ եւ քու քաղցրութեամբդ կը կերակրես բոլորը, տո՛ւր ինձի, Տէ՛ր, որ ե՛ս ալ պսակը առնեմ բոլոր անոնց հետ՝ որոնք արժանի ըրիր քու անունիդ համար մեռնելու փառաւոր մահուամբ, որպէսզի ե՛ս ալ արժանի ըլլամ յափշտակուելու քու սիրելի Որդիիդ դիմաւորութեան, երբ գայ իր ճառագայթող լոյսին մէջ առնելու սրտանց իրեն փափաքողները, եւ ճշմարտութեամբ դատելու ամբողջ տիեզերքը իր բարկութեան կրակով: Փա՛ռք քեզի, Որդիիդ եւ Սուրբ Հոգիիդ հետ միասին, յաւիտեանս յաւիտենից: Ամէն: